





3492.30  
745.1  
4



17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44





金薤琳琅卷第十六

太僕少卿吳郡都

唐故太尉文貞宋公碑

唐故太尉文貞宋公碑側記

唐開府儀同三司行尚書右丞相上

柱國贈太尉廣平文貞公宋公神道

碑銘并序

金紫光祿大夫行撫州刺史上柱

國魯郡開國公顏真卿撰并書

於戲逆鱗劇上匡救之義深守死不回臣人

之致極况乎文缺風雅道濟生靈建一陽而  
天下倚平含九德而三光式序超無友而獨  
立者其唯廣平公乎公諱璟字缺邢州南和  
人其先出于殷王元子七代祖弁魏吏部尚  
書襲列人子祖欽道北齊黃門侍郎並事跡  
崇高各見本傳高祖元節定州田曹曾祖弘  
峻大理丞祖務本皇櫟陽令父玄撫衛州司  
戶贈戶部尚書自田曹至于尚書皆實浮於  
名而位不充量事見許公蘇頲所撰神道碑  
公七歲能屬文一遍誦服鳥賦丁尚書府君

憂水漿絕口者五日八九歲時嘗夢大鳥啣  
書吐公口中而咽之遂乘而直上倏忽驚寤  
猶若下在胸間自後藻思日新襟靈益爽年  
十六缺二讀易曠時不精公遲而覽之自亥  
及寅精義必究明年進士高第補上黨尉轉  
王屋主簿相國蘇味道為侍御史出使精擇  
判官奏公為介公作長松篇以自興梅花賦  
以激時蘇深賞歎曰真王佐才也轉合宮尉  
長壽三年從調判入高等有司特聞天后親  
問所欲公以代為唐臣不求榮達詭奏云家

本山東顧得魏之一吏遂手詔授錄事參軍  
拜舞趨出異而召還又手詔拜監察御史裏  
行尋丁齊國大夫人憂服闋築室反耕志圖  
不起俄而即真遷殿中侍御史同列有博于  
臺中者將責名品而黜之博者惶恐自匿翌  
日公獨正辭引過天后悅而釋之遷天官負  
外郎鳳閣舍人御史中丞乃謂所親曰吾比  
欲優游鄉里不圖要近驟至於斯其敢廢所  
職乎乃悉心納忠無所回避時張易之昌宗  
兄弟席寵脇權天下側目公危冠入奏奮不

顧身天后失色蒼黃欲起公扣頭流血誓以  
死爭拾遺李邕奏曰陛下坐則天下安起則  
天下危內史令出公曰天顏咫尺親奉德音

王命詞氣慷慨天后震悚遂俱攝詣臺廷立  
切責二豎服栗氣索不敢仰視自朝至于日  
晏勅使馳赦之公不得已而罷又令詣公謝  
罪公拒之後有慘恤二豎乘弔公辭曰責近

不宜與執政通問假滿朝士慰公二豎又欲  
序進公舉板迎揖之不得成禮而去神龍之

興復也公實佐奇謀及當疇庸讓而不受曰

清宮問罪事缺五皇祀夏中興功歸明主非

曰逃賞誰敢貪天俄拜朝散大夫吏部侍郎

兼諫議大夫遷黃門侍郎嘗遇梁王武三思於朝三思方欲言事公正色謂之曰當今復子明辟王宜以侯就第何得上干朝政三思慙懼而退請急累月俄而兼攝尚書左丞中宗將幸西京深虞北鄙乃兼檢校并州大都督府長史又改兼貝州刺史與數人同辭三思獨揖公住公顧謂之曰諸人已出不可獨留遂揖之而去屬年穀不登國租罷入三思食邑公悉蠲之既屢挫其鋒亦處之自若俄而真拜轉杭州又遷相州又為洛州長史唐

隆初拜吏部尚書同中書門下三品粵五日兼右庶子尋加銀青光祿大夫玄宗之在儲闈鎮國太平長公主潛謀廢立嘗於光範門內生步檐中諷宰相以此旨諸相失色莫敢先言公盛色詰之曰春宮有大功主安得異議遂奏婦人干政恐生禍階請不令朝謁俄而男又縱橫公奏之繇是貶楚州刺史主亦竟以凶終無何復拜銀青歷魏兗冀三州兼河北按察使尋遷幽州都督兼御史大夫復為魏州入為國子祭酒東都留守開元二年拜

御史大夫兼京兆尹貶睦州刺史轉廣州都  
督充按察經略討擊使又兼御史大夫特許  
便宜從事前是首領桀驁多據洞不賓公之  
下車無敢不畏彼之風俗字缺一趨苟藺茹茨  
竹櫓比屋鱗次火災歲起煨燼無餘公教之  
度材變以陶旒千甍齊翼萬堵皆興于今賴  
焉燕國公張說嘗為碑頌無何使中官揚思  
勗召公公拜恩而就馬便行在路竟不交一  
言思勗以缺軍貴達泣辭訴帝帝嗟嘆久之  
拜刑部尚書四年遷吏部兼黃門監監脩國

史五年復兼侍中明年駕達東都至三峯馳  
道隘稽車騎不得前河南尹李朝隱知頓使  
中丞王怡並坐當降黜公奏曰若致罪二臣  
將來必受其弊遂命公捨之曰陛下責之以  
臣言免之是過歸於上恩由於下臣請使且  
待罪然後俾其復職遂嘉而從之玄宗嘗命  
公名諸皇子及公主邑號既而又令各定一  
美名公奏稱士子均養鳴鳩之德錫以名號  
不宜有殊若母寵子異恐非正家之道王化  
所宜玄宗悅而從之八年拜開府儀同三司

進爵廣平郡開國公策勲上柱國狂豎權梁  
上構逆長安有司深探其獄公按覆如京兆  
司錄李如璧等百餘家皆以借宅假器悉當  
連坐公以婚姻假借天下大同至于京城其  
例尤衆知情即是同反無罪不合論辜兇渠  
之外一切原免天下欣服焉中書令河東公  
張公傑出將明之材獨運廟堂之上鏡機朝  
澈見事風生求公規模悉閱堂案每至危言  
讜議執正守中未嘗不廢卷失聲汗流洽背  
其為通賢所服也如此十三年駕幸東都以

公為西京留守公極言得失無有所隱玄宗  
感悅制曰所奏之言置諸座右出入觀省以  
誠終身因賜綵物二百疋明年又兼吏部十  
七年拜尚書右丞相雅善戲謔不常矜莊與  
故缺二尚書王皎為莫逆之友晚而彌篤凡  
所詎諧人輒踧取端五日蒙賜鍾乳命醫歸  
鍊或以為止藥殊異不宜委之公曰推誠求  
信猶懼弗應猜以待人信其可得聞者慙退  
廿一年抗疏告老至于再三手詔優遂特給  
全祿賜絹五百匹還東京公以為大臣歸休



不宜閔通人事遂杜絕賓客其年駕幸洛陽  
公迎拜道左玄宗親駐龍蹕使榮王婉勞問  
者數四自後中使往來賞賚不絕方崇乞言  
之典以極師臣之敬廿五年仲冬月十有九  
日寢疾薨于東都明教里第享年七十五天  
下失聲玄宗震悼追贈太尉謚曰文貞公賻  
物米粟常數有加喪葬官供仍詔河南少尹  
崔釋之充監護使夫人齊國夫人博陵崔氏  
滄州長史藝之女湫慎嚴整高明柔克訓諸  
子而慈且有威佐丞相而德無違者門內之

理一以見咨躡公而歿允終偕老嗚呼公有  
七子復同州司功先公而卒昇尚書郎太僕  
少卿尚漢東太守渾職方郎中諫議大夫御  
史中丞東京畿採訪使太子左諭德恕都官  
郎中延太原少尹華判入高等登封尉尉氏  
令衡右散騎常侍兼御史中丞河西節度行  
軍司馬或肅或文或哲或又克篤前烈以休  
令聞以戊寅五月廿九日虔奉遺約歸葬公  
于沙河縣太尉鄉丞相原之先塋夫人合而  
祔焉禮也惟公間氣降神應期傑出生知禮

度天縱才明玉立殿天子之邦介然秉大臣  
之節震電憑怒說言而不有厥躬鼎鑊沸前  
臨事而義形乎色蠢迪檢押難常情之所易  
志深直諒易古人之所難外其身而富貴不  
離行其道而死生弗替非夫合一之德格于  
皇天不二之心形于造次則何以异是乎允  
所謂振古之无龜皇王之威實者矣且夫公  
之德烈克塞寰寓公之謀猷著明日月大曆  
五年冬十二月孫儼懼遺盛美不遠求蒙以  
真卿天祿校文叨太僕之下列憲臺執簡承

諭德之深知雖青史傳信實錄已編於方冊  
而豐碑勒銘表墓願備於論撰謹憑吏部員  
外郎盧僎所上行狀略陳萬一多恨闕遺其  
辭曰

天命玄鳥降而生商湯孫之緒微子分疆詞  
招正則尉翼文皇吏部黃門紛綸耿光忠賢  
世出信史相望篤生丞相祚我有唐文明純  
嘏毅烈堅剛恒衛間氣星辰降芒嶷然山立  
鏗爾金鏘忠孝之盛人倫紀綱垂髻能文夢  
鳥發祥通昔究易冲齡擅場勝冠結綬歷政

洋洋乃尉合宮貳軺琅琅賦嗤梅豔篇美松  
長蘇公嗟稱才必佐王滿歲從調試言高驤  
登聞黼屨驟列繡裳邁跡天官如珪如璋司  
言鳳閣綸綍煌煌乃作中丞威稜莫當志除  
兇狡廷劾二張天后愕眙百寮震惶公獨凜  
然出身激昂義形顏色精貫穹蒼皇室中興  
嘉謀克彰功成牢讓事軼屠羊貳職選曹諫  
議是匡載清流品屢奏封章乃侍瑣闥時維  
夕郎悉心糾正庶績咸康三思睢盱席寵干  
常基之就第慙惧靡亢左曹攝轄大鹵于襄

兼刺貝丘勿辭鴈行三思揖語公獨循墻處  
之不忤轉旆于杭既還鄴城遂尹洛陽乃作  
冢宰訐謨廟堂俄兼宮相亟綰銀黃玄宗登  
儲鎮國是遑潛謀廢立謠詠相翔厥男撓政  
累奏愆殃聿臨楚邦荐察冀方總督幽薊翻  
飛國庠亞相烈烈尹京趨趨旋臨建德歛蒞  
南荒俚師咸蕞茅摠是攘張公頌德雋永甘  
棠所忠來召拜命即裝路無交言帝用式臧  
載司刑吏八座抑揚兼監黃樞鈞軸是將匪  
躬蹇蹇終始泯泯乃拜儀同允釐保障河東

閱故汙洽如漿狂豎犯關兇渠旣戕命公覆  
獄咸脫死亡乃陟右揆右揆決決每譴王君  
豈常矜莊懸車告老庶保康強方崇饋醕孤  
映鱣緗天不勲遺萎哲壞梁一人震悼九有  
淒涼市旣罷賈春仍絕糧乃贈太尉飾終禮  
滂返窆沙河羽儀央央闔朝傾祖河尹護喪  
生榮死哀行路感傷令人孺慕攀泣煌煌高  
墳崔嵬鉅鹿劇旁森梢宰樹繚繞連岡于嗟  
廣平宅此不暘孝孫翼翼論譔靡忘豐碑碣  
豎萬古訾相

曆七年歲次壬子九月二十五日

孫儼追建

唐故太尉文貞宋公神道碑側記

初公任監察御史持服于沙河縣屬突厥寇  
趙定州河朔兇懼邢州刺史黃文軌投艱于  
公公以父母之邦金草無避及賊至城下公  
爲曉陳禍福其徒有素聞公威名者乃相率  
而去之開元末安西都護趙含章冒于貨賄  
多以金帛賂遺朝廷之士九品以上悉皆有  
名其後節度范陽事方發覺有司具以上聞

玄宗切責名品將加黜削公一無所受乃進  
諫焉玄宗納之遂御花萼樓一切釋放舉朝  
皆謝公衣冠儼然獨立不拜翌日入奏玄宗  
謂公曰古人以清白遺子孫乃卿一人而已  
公曰含章之賄偶不至臣門非不受也玄宗  
深加嘆之前碑闕焉故略述于此公第三子  
渾之為中丞也方欲陳乞御制碑頌未果而  
中受譴謫旋羯胡作亂事竟不成真卿時忝  
監察殿中為中丞屬吏故公孫儼泣請真卿  
論謨之昭義軍節度觀察使尚書左僕射兼

御史大夫平陽郡王薛公曰嵩以文武忠義  
之姿為國保障上慕公之德業歎尚無窮次  
嘉儼之懇誠崇豎莫致迺命屯田郎中權邢  
州刺史封演購他山之石曳以百牛僦刻字  
之工成乎半歲磨礪既畢建立斯崇遠近嗟  
稱古今榮觀雖大賢為德對善庸限於存亡  
而小子何如附驥托跡於階序真卿刺湖州  
之日因成文請儼刻其側而志之未及雕鐫  
而第六子衡因謫居沙州叅佐戎幕河隴失  
守介于吐蕃以功累拜工部郎中兼御史河

西節度行軍司馬與節度周鼎保守燉煌僅  
十餘歲遂有中丞常侍之拜恩命未達而吐  
蕃圍城兵盡矢窮為賊所陷吐蕃素聞太尉  
名德曰唐天子我之舅也衡之父舅賢相也  
落魄於此豈可留乎遂贈以駝馬送還于朝  
大曆十二年十一月以二百騎盡室護歸士  
君子偉之乃古來所無也上欲特加超獎且  
命待之于側門十二年春三月吏部尚書顏  
真卿記

宋公神道碑獨完好惟碑側記缺八字


碑去官道二里餘世罕知者以故父不  
顯于世致君因謁墓下始得之且難舊  
史不載新書闕遺乃刻顏公體大書字  
畫別刻于石庶久其傳邢惟襄國舊都  
丘塚纍然類皆堙滅于無聞獨公之墓  
高不踰丈豐碑尚存豈特忠義足以垂  
名于不朽世亦以顏魯公之賢而此碑  
尤為可貴也墓之東有碑缺二之祖贈  
邢州刺史為居民斧而剝之所謂側門  
是也自衡之後子孫無顯宦于唐今有

隸編戶者猶收公誥官置墓田俾耕以  
守誥為前政取去莫知所在大宋崇寧  
二年七月一日編脩國朝會要所檢閱  
文字范致君記  
右唐宋文貞公碑并碑側記皆顏魯公  
撰并書文貞墓在  
之沙河縣碑久  
埋沒土中近予友方思道作縣出之重  
樹於墓以搨本見示金石錄謂碑與新  
史不同者二事又謂碑側記載文貞逸  
事甚詳而新舊史皆無之子家藏魯公

文集中有此碑因得比較以補石本之  
缺但其文時有小異如集本云建一言  
而天下倚平碑一言作一陽集本云曾  
祖弘俊碑作弘峻集本云嘗夢大鳥啣  
書吐公口中公吞之碑作大鳥啣書吐  
公口中而咽之集本云欲優游自免碑  
自免作鄉里集本云左右震竦碑左右  
作天后集本云勅使馳救之碑救作赦  
集本云與執法通同碑作與執政通問  
集本云玄宗將幸西蜀碑作中宗將幸


西京集本云公盛氣詰之碑氣作色集  
本云東宮有大功宗廟社稷主也安得  
異議碑作春宮有大功王安得異議集  
本云駕幸洛陽碑作駕達東都集本云  
馳道險隘行不得前碑作馳道隘稽車  
騎不得前集本云以臣免之碑臣字下  
有言字集本云母寵子愛碑作母寵子  
異集本云勅公按覆碑無勅字 集本  
云置之座右碑之作諸集本云仲冬十  
九日碑作十有九日集本云喪塋官供

碑喪葬作器葬集本云戊寅歲五月碑  
無歲字集本云叨太僕之下烈碑烈作  
列集本云義形言色碑言作顏集本云  
既遷鄴城碑遷作還集本云汙洽流漿  
碑流作如其不同者又如此此則趙氏  
之所未及也





金薤琳琅卷第十六



金薤琳琅卷第十七

太僕少卿吳郡都

穆

唐達奚珣游濟瀆記

唐濟瀆廟北海壇器物銘

唐姜源公劉廟碑

唐伯夷叔齊二公碑并序

游濟瀆記

吏部侍郎達奚珣文

監門衛兵曹參軍薛希昌書

軹縣南北數十里濟水出焉稽乎舊章可得

而道自河浮錄甲帝命玄夷䟽剛澮而正乾  
網鍤陵巒而通委輸所謂四瀆資我而成彼  
貳水者或在幽僻遠而貌竒伊何足貴豈與  
夫體清淳之氣據函夏之中平地開源分空  
正錄表裏皆淨似若非深舟楫旣加乃知無  
底冲和自抱斯君子之量歟從此而東截河  
通汶不以險阻關其勢不以清濁汨其流終  
能獨運長波滔滔入海沉潛剛克斯君子之  
量歟意者洞幽明貫天壤包荒萬類出入無  
間形與化遊復歸於道不然何其異也雖金

火交作變通殊制而浮沉之事亦無捨旃國  
家南正司天北正司地以爲百神授職則陰  
陽無錯繆之災群望聿脩水土得平均之序  
欽若稽古道豈虛行閔宮有洩象設如在流  
目一望森森動人覺毛髮之間風颺四起然  
後以諸侯之禮禮而禋之至於下人日用蘋  
藻吉凶悔吝則以情言且神道無方豈存於  
此而物類相召或有憑焉盭溜潛通動植茲  
液高樹直上百尺無枝虛篁下清四時一色  
意隔人世空聞鳥聲陽浦先春草心方變危

岸猶冷苔生未穠紅晶落而天下陰青靄凝  
而衆山暮留賞無厭歸情坐忘中途載懷歷  
歷在眼庶記豪翰光昭厥美云

右游濟瀆記唐吏部侍郎達奚珣撰兵  
曹參軍薛希昌八分書濟瀆在今河南  
濟源縣西十里歲癸酉仲冬予亦嘗獲  
遊瀆有祠以祀大濟之神其殿北復有  
北海神殿北海之前有池周七百步其  
西一池周與之等而中通焉即濟水所  
聚蓋其源自王屋山天壇之顛伏流百

里至此復見東南合流至溫縣歷魏公  
臺入於河禹貢所謂導汎水東流爲濟  
是也東池俗傳間能出物以應人之求  
然率始於三月至四月望而止餘月則  
否蓋春夏之交泉脉騰沸而濟尤勁疾  
物隨沸而上人或取湏臾復沉予之  
遊也默禱於神願出物以彰靈異道士  
云隆寒水泉不動物不能上予笑曰豈  
有靈神而畏寒者乎爾姑為我禱久之  
物竟不能出道士之言始信而世俗所

云皆誕妄也

唐濟瀆廟北海壇新置祭器沉幣雙舫雜物之銘并序

朝散大夫行河南府濟源縣令張

洗字濯纓撰

有唐六業海內晏然偃革

字缺二

崇乎祀典封

茲瀆為清源公建祀於泉之初源也置瀆令

一員祝史一人齋郎六人執魚鑰備灑掃其

北海封為廣澤王立壇附于水之濱矣天子

以迎冬之日命成周内史奉祝文宿齋毳冕

七旒五章劍履玉珮為之初獻縣尹加繡冕

六旒三章劍履玉珮為之亞獻邑丞玄冕加

五旒無章亦劍履玉珮為之終獻用三牲之

享知之大事先在祀乎濯纓不才謬領茲邑

下車入廟每事皆問主者有云俎豆素闕弊

難悉數其尤者有五北海望壇臨事壘土朽

椽一歲而費數金為勞之甚其弊一也二所

祭器凡百有二十二事至時請於上寮轉轂

入洛去來三百餘里仍以稅緡酬之積有歲

時不知窮極其弊二也沉幣雙舫又以車取

池河渡口之舟往返之勞結綵之飾其弊三也兩壇位席百領有餘戶至誅求為擾非潔其弊四也牀榻乃至七著用之類門到斂索事終存亡太半其弊五也既革前弊輒為之銘銘曰

寤寐求思如神有知大風離披壞木於斯人吏驚馳念茲悟茲前年夏及今年春大風壞檜槐數株因用此材而為

祭器兼沉幣之舫也為余有意廟中無備沉幣雙舫二壇祭器子來悅使所借皆遂觀者闐闐事無闕焉刻之于石以待後賢是時也貞元十有

三年

右唐濟瀆北海壇器物銘濟源縣令張洗撰歐陽公謂洗之所記乃開元時事州縣祠廟置齋郎六人官不勝其濫又謂史家不能詳載惟於碑刻見之按碑作於貞元十三年歐陽公誤以貞元為開元且碑載廟有令一人祝史一人則其官固不止於齋郎考之唐書百官志五岳四瀆令各一人主掌祀事此外又有祝史各三人齋郎各十三人則官之

濫又不止如歐陽公所書而史家亦未嘗不詳載也但與碑有不同耳

唐姜嫄公劉新廟碑

太中大夫行中書舍人上輕車都尉賜紫金魚袋高郢撰

節度巡官將仕郎試大理評事張

誼書

姜嫄者炎帝之後有邠氏之女姓姜字嫄帝嚳之元妃后稷之母也公劉者后稷之曾孫周文王之十代祖也姜嫄嘗出遊見巨跡而

履之載震載夙時維后稷以居然生子心所不康初寘之隘巷再寘之平林三寘之寒冰皆有以全度者既而收之遂名之棄生有赫靈之異長有躬稼之勤法施於人以濟粒食堯乃命為農師而封諸邠農師實后稷也古初造物首出群理事必出之本言必天地之際當虞舜之時稱禹平水土契布五教稷播百穀咎繇明五刑地平天成萬代永賴舜以奮庸命禹禹讓于稷皋繇及以元后命禹禹獨讓于咎繇曰朕德罔克人不依咎繇邁

種德德乃降黎人懷之茲大禹所以言天意  
永命之所歸字缺一夏有天下載祀四百禹之  
祚也商有天下載祀六百契之祚也周有天  
下載祀八百后稷之祚也自時厥後百王澆  
季而咎繇字缺一積累在天天祚永歸有所底  
止乃以無彊之曆命我聖唐盛德大業與天  
地准追視三代猶指掌矣昔者周字缺一文武  
之烈本於后稷后稷之生本於姜嫄故詩曰  
厥初生人時維姜嫄后稷之子曰不窋失官  
而奔於戎狄不窋之孫曰公劉字缺一於豳居

以平西戎以篤前烈故詩曰篤公劉于邠斯  
館是知姜嫄有德於周公劉有德於豳先賢  
所出立祠舊矣我國家稱秩元祀咸秩無文  
山川鬼神亦莫不寧而姜嫄公劉之廟舊制  
卑陋湫隘在市非所以崇明祀敬鬼神也貞  
元四年字缺一邠寧節度觀察使檢校刑部尚  
書兼御史大夫朗寧郡王張公獻甫戎醜是  
膺授鉞而至肅肅王命維公將之烈烈字缺一  
成之略地千里亭鄣嚴於外啓行一戰弓矢  
窵於內卒秉睦而知禮風俗康而狎野覩此

二廟獨為匪安公曰嘻精潔莫重於明神喧  
字缺一甚於市鄜柰何雜處乎夫小人者知鼓  
舞之事神而不知絜狎之慢神知事神之求  
祐而不知慢神之賈禍茂草一去遺塵萬祀  
字缺一而無知則已若曰有知而喧囂瀆易之  
俾中夫札瘥天昏之患者得非長吏慈惠之  
不足耶乃以不忍人之心行不忍人之政且  
為字缺一既而卜遷粵以貞元六年十一月九  
日作新廟於南郭焉地則郊野之閑左水右  
山有清謚之勝材則楹遷之至上棟下宇非

徵斂之字缺一則農務之隙量功命日無妨奪  
之弊移嘉木而樹之考良辰而落之神於是  
嚴威而蠲乎所處人於是祇惕而遠乎所瀆  
是惠於人無過之地而寧神於不怒之境仁為  
已任不亦厚乎夫神聰明正直者也唯忠肅  
恭懿乃能承之順此而祭不必多品故雖澗  
谿之毛汗之水而君子率是四德陳於二簋  
行之以禮奉之以懃潔之以齋達之以和則  
神可得而事焉祐可得而致焉夫子曰丘禱  
久矣抑為尚書張公以文武之憲純一之良



知無不為忠也正色帥下肅也執事有恪恭也擇善而從懿也自先幽州大夫以來一門四人缺三方繼踵勲績為時心膂所資非他忠肅恭懿而已用能承天之寵獲神之勞以屏王室以揚家聲也宜哉祠成三歲矣而銘記尚闕將恐滯遠失其所由乃陳梗槩爰此刊刻辭曰

何賢乎姜嫄曰克生后稷何賢乎后稷曰克降農殖后稷之道至今賴之姜嫄之德如何勿思何賢乎公劉曰肇宅豳土何缺一豳土

曰平戎之所乃今乃古有廟有宇宇亦既卑廟亦既摧闐闐朝合蹶塵暮開蚩蚩群眈屑屑徘徊瀆禮非敬犯神有災朗寧戾止理化咸集財豐眾和暴禁兵戢惟此墻屋公私必葺矧伊明祠風雨所及是度是築乃遷乃立奉我皇德達于有神揚神之威靜乎虜塵亦惟正直克贊忠純勒銘茲庭永示邑人

節度判官殿中侍御史韋丹建立處士

張瑄篆額

右唐姜嫄公劉新廟碑中書舍人高郢

撰試大理評事張誼行書廟在今邠州城南唐邠寧節度觀察使張獻甫所遷故當時稱曰新廟而高郢為文予昔以尚書郎出使寧夏道邠謁廟其後稍上平爾雅大野曰有履迹平俗作坪非乃姜嫄履巨人迹所在予為大書履迹平三字俾州官刻寘廟側盖州人但知有廟而少知乎此故表而出之

唐伯夷叔齊二公碑并序

安定梁昇卿纂文及書

二公諱伯夷叔齊昔有殷時遼東孤竹君之子也自歷載所記有國以來事之善者莫先於讓是故君老於位命立叔齊齊固辭以請伯伯固請以不嗣遂相與義退遯逃西周當是時也帝殷不臧用錯天紀人棄莫保以戴于周周武王秉白髦杖黃鉞經綸所以撥亂威略所以罰雷震萬國風行六師二公于時推忠臣之誠明死君之節伏車而諫慷慨瀝血且夫大運不以肯曠達節不以義距黔首焉得以厭毒鬼神焉得以無主於是討罪

于商爲天下王二公以立志真也檢身操也  
建侯戡難不可以闕也以臣伐君不可以訓  
也相於國莫非其止異於事不食其粟乃西  
上首陽之山歌采薇而死蓋天下義感之始  
也及孔子生東周之季演中興法游夏之徒  
皆誨納於教未嘗叙仁人烈士不先于二公  
者焉謂不辱其身不降其志矣若乃紛綸茂  
德載在策府則太伯之道子臧之仁也上思  
附義退曰能賢則宋穆之言延陵之行也道  
無不貴志不苟合則許由之尚伯成之高也


慮必中清廢能中權則虞仲之居夷佚之放  
也聲 事載功存業廣則范蠡之去魯連之  
辭也此數公者至於黜榮保讓亦爲盛矣兼  
之固君臣之分以愛其節則曷可以同議也  
所謂繼之者忠矣杖之者義矣施之者誠矣  
用之者確矣昭矣至矣躡免矣免上古無以加  
百代爲之憲越大梁歲行于是邦遇縣宰太  
原王公惠工訓農勸學敬教群業頓以繫賴  
四方咨於作則邑臨末周人悅有化以爲二  
公廟德不祀實甚懼焉復何以圖不朽示來

者而已遂因簡力考餘時經始是資敦崇舊  
規厥構棘翼自公尸之然則表前載揚懿烈  
使駿光熊能彰紀事也以吾學乎舊史氏請  
隲其文固不佞乃作銘曰  
大道混混或險夷兮殷實荒德莫業于主人  
神疑兮帝用克商大運期兮天下爭利而獨  
犇義貞名垂兮神農虞夏氏已沒曷所惟兮  
斲石千秋聞風規兮黃鉞不降志

開元十有三年惟一月既望刊立衛鶴  
趙禮范謙刊

金薤琳琅卷第十七





金薤琳琅卷第十八

太僕少卿吳郡都穆

孔子廟堂碑

破邪論序

孔子廟堂碑

太子中舍人行著作郎臣虞世南

奉勅撰并書

司徒并州牧太子左千

闕一字

率蕪

檢校安北大都護相王旦書碑額

微臣屬書東觀預聞前史若乃知幾其神惟

睿作聖玄妙之境希夷不測然則三五迭興  
典墳斯著神字闕一聖跡可得言焉自肇立書  
契初分爻象委裘垂拱之風革夏翦字闕五質  
文殊致進讓罕同靡不拜洛觀河膺符受命  
名居域中之大手握天下之圖象雷電字闕二  
威刑法陽春而流惠澤然後化漸八方令行  
四海未有偃息鄉字闕六預帝王之錄遠跡闕一  
字史之儔而德侔覆載明蕪日月道藝微而  
復顯禮樂弛而更張窮理盡性光前絕後垂  
範百王遺風於萬代猗歟偉歟若斯之盛者

夫子膺字闕二之精踵千年之聖固天縱以挺  
質稟生德而降靈載誕空桑自標河海之狀  
纔勝逢掖克秀堯禹之姿知微知章可久可  
大為而不宰合天道於無言感而遂通顯至  
仁於藏用祖述先聖憲章往哲夫其道也固  
以孕育陶均包含造化豈直席卷八代并吞  
九丘而已哉雖亞聖鄰幾之智仰之而彌遠  
亡吳霸越之辯談之而不及于時天歷浸微  
地維將絕周室大壞魯道日衰永歎時艱實  
思濡足遂迺降跡中都俯臨司寇道超三代

止乎季孟之間蓋論五伯終從大夫之後固  
知栖遑弗已志在於求仁危遜從時義存於  
拯溺方且重反淳風一匡未運是以載贄以  
適諸侯懷寶而遊列國玄覽不極應物如響  
辯飛龜於石函驗集隼於金橫觸舟既曉專  
車能對識罔象之在川明高羊之興兩知來  
藏往一以貫之俾否泰有期達人所以知命  
卷舒惟道明哲所以周身牖里幽憂方顯姬  
文之德夏臺羈紲弗累商王之武陳蔡為幸  
斯之謂歟於是自衛反魯刪書定樂贊易道

以測精微修春秋以正褒貶故能使紫微降  
光丹書表瑞濟濟焉洋洋焉充宇宙而洽幽  
明動風雲而潤江海斯皆紀乎竹素懸諸日  
月既而仁獸非時鳴鳥弗至哲人云逝峻嶽  
已隕尚使泗水却流波瀾不息魯堂餘響絲  
竹猶傳非夫體道窮神至靈知化其孰能與  
於此乎自時厥後遺芳無絕法被區中道濟  
天下及金冊斯謨玉弩載驚孔教已焚秦宗  
亦墜漢之元始永言前烈褒成爰建用光祀  
典魏之黃初式遵故訓宗聖䟽爵允輯舊章

金行水德亦存斯義而晦明匪一屯亨遞有  
筐筥蘋蘩與時升降靈宇虛廟隨道廢興炎  
精失御蜂飛蝟起羽撒交馳經籍道息屋壁  
無藏書之所階基絕函丈之容五禮六樂翦  
焉煨燼重弘至教允屬聖期大唐運膺九五  
基超七百赫矣主猷蒸哉景命鴻名盛烈無  
得稱焉皇帝欽明睿哲參天兩地迺聖迺神  
允文允武經綸去始時惟龍戰爰整戎衣用  
扶興闕一神謀不測妙筭無遺弘濟艱難平  
壹區宇納蒼生於仁壽致君道於堯舜職兼

三相位總六戎玄珪秉石之尊朱戶渠門之  
錫禮優往代事踰恒典於是在三闕命闕四

充隆帝道丕承鴻業明玉鏡以式九圍席蘿

圖而御六辯寅奉上玄肅恭清廟宵衣旻食

視膳之禮無方一日萬機問安之誠彌篤孝

治要道於斯為大故能使地平天成風淳俗

厚日月所照無思不服闕一獯戎為患自

古周道再興僅得中筭漢圖方遠纔聞下冊

徒勤六月之戰侵軼無厭空盡貳師之兵憑

凌滋甚皇威所被犁興睭納空山盡漠歸命



闕庭充仞藁街填委外殿開闢已來未之有也  
靈臺偃伯玉闕虛候江海無波烽燧息警  
非煙浮漢榮光莫河楛矢東歸白環西入猶  
且兢懷闕二馭朽納隍卑宮菲食輕徭薄賦  
斲珣反樸抵璧藏金革鳥垂風綈衣表化歷  
選列辟旁求遂古克已思治曾何等級於是  
眇屬聖謨疑心大道以為括羽成器必在膠  
雍道德潤身皆資學校矧迺入升妙義析理  
微言厲以四科明其七教懿德高風垂袞斯  
遠而棟宇弗修宗祧莫嗣用紆聽覽爰發絲

綸武德九年十二月廿九日有詔立隋故紹  
聖侯孔嗣哲子德倫為褒聖侯乃命經營惟  
新舊趾萬雉斯建百堵皆興揆日占星式規  
大壯鳳薨騫其特起龍栴儼以臨空霞入綺  
寮日暉丹檻窅窅崇邃悠悠虛白闕二寫狀  
妙絕人功象設已陳肅焉如在握文履度復  
見儀形鳳時龍蹲猶臨咫尺莞爾微笑若聽  
武城之絃怡然動色似聞簫韶之響檐檐盛  
服既覩仲由侃侃禮容仍觀衛肯不疾而速  
神其何遠至於仲春令序時和景淑皎潔璧

池圓流若鏡青葱槐市總翠成帷清滌玄酒  
致敬於茲日合武釋菜無絕於終古皇上以  
幾覽餘暇遍該羣籍乃製金鏡述一篇永垂  
鑒戒極聖人之用心弘大訓之微旨妙道天  
文煥乎畢備副君膺上嗣之尊體元良之德  
降情儒術遊心經藝楚詩盛於六義沛易明  
於九師多士伏膺名儒接武四海之內靡然  
成俗懷經鼓篋攝齊趨奧並鏡雲披俱餐泉  
涌素絲既染白玉已彫資覆匱以成山導涓  
流而為海大矣哉然後知達學之為貴而弘

道之由人也國子祭酒楊師道等偃玄風於  
聖世聞至道於先師仰彼高山願宣盛德昔  
者楚國先賢尚傳風範荊州文學猶鐫歌頌  
况帝京赤縣之中天街黃道之側聿興壯觀  
用崇明祀宣文教於六學闡皇風於千載安  
可不贊述徽猷被之雕篆乃抗表陳奏請勒  
貞碑爰命庸虛武揚茂實敢陳舞詠迺作銘  
云

景緯垂象川岳成形挺生聖德寔稟英靈神  
凝氣秀月角珠庭探賾索隱窮幾洞冥述作

爰備丘墳咸紀表正十倫章明四始繫續義  
易書因魯史懿此素王邈焉高軌三川削弱  
六國從衡鶉首兵利龍文鼎輕天垂伏鼈海  
躍長鯨解黻去佩書燼儒抗纂堯中葉追尊  
大聖乃建襲成膺茲顯命當塗創業亦崇師  
敬胙土錫圭禮容斯盛有晉崩離維傾柱折  
禮亡學廢風頽雅缺戎夏交馳星分地裂蘋  
藻莫莫山河已絕隨風不競龜玉淪亡樽俎  
弗習干戈載揚露霑闕里麥秀鄒鄉修文繼  
絕期之會昌大唐撫運率繇王道赫赫玄功

茫茫天造奄有神器光臨大寶比蹤連陸追  
風炎昊於鑠元后膺圖撥亂天地合德人神  
攸贊麟鳳為寶光華在旦繼聖崇儒載修輪  
奐義堂弘敞經肆紆縈重欒霧宿洞戶風清  
雲開春牖日隱南榮鏗眩鐘律蠲潔齋明容  
範旣備德音無數肅肅升堂兢兢讓席獵纓  
訪道橫經請益帝德儒風夫宣金石

推誠奉義翊戴功臣永興軍節度管內  
觀察處置等使特進檢校太師兼中書  
令行京兆尹上柱國壞邪郡開國公食

邑四千五百戶食實封一千三百戶王  
彥超再建安祚刻字

右唐孔子廟堂碑虞世南撰并正書在  
今陝西西安府學乃宋王彥超翻本字  
之缺者凡一百七十有九予家藏舊榻  
唐刻因參校以足其文嘗記在京師時  
見世南真迹謂以此文石本進呈太宗  
特賜王羲之黃銀印一顆則世南之書  
貴重於當時者固已如此但世之人不  
見真迹故鮮有知是說者

破邪論序

太子中書舍人吳郡虞世南撰并  
書

若夫神妙無方非籌筭能測至理凝闕一豈  
繩准所知寔乃常道無言有著斯絕安可憑  
諸天縱窺其窅冥者乎至如五門六度之源  
半字一乘之教九流百氏之目三洞四檢之  
文苟可以經緯闡其圖詎可以心力到其境  
者英猷茂實代有人焉法師俗姓陳潁川人  
晉司空群之後自梁及陳世傳纓冕爰祖廼

伯累業儒宗法師少學三論名聞朝野長該  
衆典聲振殊俗威儀肅穆介節淹通留連清  
翰發擿微隱比地方春用顯仁之量如愚若  
訥外闇內明之巧固能智同測海道亞彌天  
豈止操類山濤神侔庾亮而已余其文情乃  
典而不野麗而有則猶八音之並奏等五色  
以相宣道行則納正見於三空拯群生於八  
苦旣學博而心下亦守卑而調高實釋種之  
梁棟生人之羽儀者矣加以賑乏扶危先人  
後已重風光之拂照林牖愛山水之負帶煙


霞願力是融晦迹肥遁以隋開皇之末隱於  
青溪山之鬼峪洞焉迥構巖崖關一虧日月  
空飛戶牖則吐納風雲其間採五芝而偃仰  
遊八禪而寢息餌松木於溪澗披薜荔於山  
阿皆合掌歸依摩頂問道經行恬靜十有餘  
年然其疊嶂危岑長松巨壑野老之所栖盤  
古賢之所遊踐莫不身至目覩攀穴指歸仍  
撰青溪山記一卷見行於世太史令傅奕學  
業膚淺識慮非長乃穿鑿短篇憑陵正覺將  
恐震茲布鼓竊比雷門中庸之人頗成阻惑

法師慙彼後昆又撰破邪論一卷雖知虞衛  
同奏表異者九成蠅驥並驅見竒者千里終  
須朱紫各色清濁分流訶以凡測聖之豐責  
以俗校真之咎引文證理非道則儒曲致深  
情指的周密莫不輒亂旗靡瓦解冰銷入室  
有操吊之圖厥角無容頭之地於是傳寫不  
窮流布長世若披雲而見日同迷蹤而得道  
法師著述之性速而且理凡厥勒成多所遺  
逸今散採所得詩賦碑誌讚頌箴誠記傳啓  
論及三教系譜釋老宗源等合成三十餘卷

法師與僕情敦淡水義等金蘭雖服制異儀  
而風期是篤輒以藤緹聯彼珪璋編為次第  
其詞云爾

右破邪論序唐虞世南撰并小楷書世  
南之筆惟孔子廟堂碑行世此文雖歐  
陽公趙明誠皆未之見而予乃得見之  
豈非幸哉破邪論今載釋氏藏經其說  
不暇深究若世南書則予之所嗜好故  
錄之

金薤琳琅卷第十八



金薤琳琅卷第十九

太僕少卿吳郡都穆

邠國公功德銘并序

右神策軍護軍中尉副使兼右街  
功德副使雲麾將軍右監門衛將  
軍負外置同正員上柱國弘農郡  
開國侯食邑一千五百戶楊承和

撰并書

天竺有聖人焉名之為佛三身牙相應化無  
所從來百億同名不知其誰之子德包塵界

道冠萬靈有感必通酬念如響心揅惠炬永  
燭於大千手運慈航泛流於沙劫晦明不二  
淨穢兩同正智如如我無所得雖後天地而  
有質字關一天地而字關一形莫不究清濁之未  
然識方圓之始卒大矣哉若非天下之至精  
孰能如此夫大德小德優劣本同賢人聖人  
取捨各異乃引衆星之表月立萬象以尊天  
因喻發揚馮茲外飾有言子貢賢於仲尼者  
不知仲尼之聖加字關一子貢有言阿難相同  
諸佛者不知諸佛非相以攝阿難見尺晏之

至微知大鵬之至廣觀秋豪之至短知大椿  
之至長擬於物即尺晏秋豪擬於人即阿難  
子貢雖然近如來之門戶識夫子之堦牆瑚  
璣寶瓶異諸凡器金盃玉棟字關一是常材故  
佛之侍從者即迦毗令人拘耶貴族皆辯搖  
金利名振鐵圍馭六賊如衆鳥之避鷹鸞懾  
四魔若百獸之畏豺武而性海無底惠峰穿  
霄善入一乘橫通三輩被精進所縛不捨用  
心嘗修之於身去住未決或執如或斷如是  
故生已之法隨滅滅已之法隨生常生之所



不生常滅之所不滅能銓二義其唯覺乎覺不自明方明覺也夫有生滅者是覺之用無生滅者是覺之體即知覺逐滅生生隨覺滅生滅俱寂其覺亦亡乃指素月於澄溪祛外緣於見性解出人表堪為代師儔諸法王則吾豈敢何者孔子登東山而小魯登泰山而小天下今亦然也如來觀溺山而小聲聞觀枕山而小菩薩我佛也同彼虛空不染於幻強立真假曾未牢固是故說行而無所說行說而無所行非行非不行非說非不說非法

非非法非性非非性本不生無所滅元不覺無所寂於一不一中悟諸未悟者於起不起中導諸未道者大矣哉若非天下之至神又孰能如彼而夜景呈輝化行西土神光啟夢象教東來思字玉毫而字一挹鷲峰仰金偈而虔瞻具葉身已逝矣空傳結集之書性本存焉如聞在代之說且法以辯志言以辯心非法無以悟其心非言無以成其志即言說文字皆解脫相有是經處即見如來今有右街功德使驃騎大將軍行右武衛上將軍知內

侍省事上柱國邠國公食邑三千戶充右神  
策軍護軍中尉安定梁公曰守謙職是禁營  
邦家重器居繁不亂兼總緇黃讀佛言親釋  
氏其貞元中公以溫惠為甲冑清慎為戈矛  
跡尚彤闈名高紫闥至元和初授銀璋佐密  
命鼓翼高岫躍鱗洪波飛鳴近天得志江海  
五年加金紫掌樞機渙汗流心散為膏雨如  
絲入耳開展成綸捧白日以揚光戴青天而  
翼化處事之極動而可觀至十二年遇蔡人  
逆戎事興天討未平干戈在野天心恐師老

矣而誅剪未就乃命公撫衆觀敵審度遲速  
乃奉辭伐罪踴躍而行走四牡以宣暢鴻休  
利萬物以車塵相屬參整戎事董護諸軍與  
將師同其進也一其議也或縱六奇之辯即  
濤生巨浦雲出深谿或察五間之情即趙撝  
穿揚楚金伐木若有神助不謀成心我旗旣  
張我車亦列均勞逸而義夫爭死齊賞罰而  
奮臂爭駟蓄銳候時果申長策於是選精卒  
張詭道雜旌旃而不嚴部伍差進退而曲敵  
之心實為鋒鏑詐餌武口賊果輕襲利吾大

軍遂使晝掩沙河葛伯之賊夜遯合流宵渡  
邵陵之寇全平駭若奔雷勢同激電似霜霑  
寒草風卷餘花縱烈火於平蕪走飛泉於大  
壑摧枯易折墜瓦難全滅蔡之功十有其七  
餘賊保迴曲官軍圍郾城我鼓音方厲武旅  
方雄操利柄而目無金牛執其吭如葛豢悅  
口摩壘悶罪登陴不降梯樓滿空矢石相接  
經四十日燿火失繼人無鬪心畏夏日之赫  
光懼春冰之易泮乃降仍邀公疋馬視師撫  
納疑懼公悅以犯難投誠若歸遂令啓開按

轡而入醜類或鼓或罷相視失色公曰來余  
與爾言爾本吉人也何不徇國家之急成其  
名而託身於武豹之穴求其噬輿尸覆族誰  
與咎耶皇情極念之故令守謙布澤潤心宣  
化清耳能悅生避禍者當聽之曰明明天子  
清問下人不能勤王爾失遠略為寇盜所制  
而臣節難全犯孤矢之威當剗絕之斃圓首  
方足莫匪精靈念其瘡痍實可憫惻然違予  
戮汝而不赦恭命活汝而無害能遷其不祥  
而為祥吉莫大也變其不幸而為幸令莫窮

也賊將卒等色轉慙禮逾謹闕一曰皇上聖

文紹統神武膺期惟德動天無遠不格被堯

舜之法服行堯舜之法言所以大文教而九

有小康小武功而天下大理嘗欲戢矛楯親

稼穡使人居安各得其壽爾一方不能安時

虛順守衛中國而罪罟自結厲階彌崇即不

得已而興師非樂毅人也况天德好生容長

萬物是以曲開洗汙旁設自新招示頑夫以

明廣大將士等久遭苛暴翻跡令圖亦謂朽

燼重燃枯條再葉國刑當宥咸賜無辜豁爾

憂心以承慶賞降人皆投戈卷旆匣刃弛弦

觸地血流向闕蹈舞於是五千叛卒不戮一

人十萬王師皆服其德從此鯨鯢失浪烹飪

方因惡鳥巢傾折翼於此恩波大澍封錫有

差乃授公右監門衛將軍飛詔追還密職如

故又掌天地之戶牖捧造化之閔捷勲隨日

厚望逐時深公之美也不滅直以沽名不愆

義以犯物動靜無隱發言有章至十三年天

睽凝嗟賞重知勞不自伐功不自德遂與戎

印授兵符司禁旅之右也公積仁成器積器

成名卑牧難踰高光可仰定止足之分動必  
師心辯榮辱之機道樞不撓薄嗜慾以守一  
鄙浮華而處中匡護玄流酌之不竭伏以元  
和長慶釋教大興雅叶所歸轉得親近謹於  
大興唐寺花嚴院為國寫古今翻譯大小乘  
經論戒律合五千三百廿七卷公私祿利不  
入其門凡是難得無所愛惜嘗求善書者令  
絕外塵不飲茹浴身至于精刹焚香而就筆  
硯擇其力多者以多價酬之少者去之人不  
約而自勸也於是滌素流光含丹縱彩雲生

墨沼之上花開方絮之中衛索分鑣王羊並  
驚各行軌轍跡不相讓又立經堂一所三閭  
徘徊安住法輪必資豐敞作制惟永壯我皇  
都豈得為工者不極其妙為材者不極其美  
殊形異狀生於斤斧之中曲直方圓豈逃繩  
墨之下於是彩棟霞張雕楹雲布朱扉洞啓  
縹壁含光羽族棲於綺憲鱗介遊於藻井脩  
羅率下爭提天矯之梁藥叉命徒競戴炭峩  
之拱衆靈翼衛諸天護持恍惚莫辯其形來  
往不留其跡又於堂內造轉輪經藏一所刻

石為雲鑿地而出方生結構迎闕二緣立無

數花幢竊比堯率造百千樓閣同彼化城狀

物類本擬容奪真鵙鵠若飛而不飛虹螭似

走而不走藥櫃擲比雜之以琳琅椽栢駢羅

飾之以珠翠凌空互級方開四門璀璨相輝

煥麗交映離婁覘之炫目公輸閱之奇闕二

歲古人多有慙色不知來者孰能繼歟於是

方表含輪虛中不滯群經之府所好必從遊

藝者任其卷舒杖德者恣其探討或超諸垢

穢蓮花随手而開敷或等彼清涼甘露應心

而滴瀝乘之所妙者不論其小大法之所尚

者闕二其淺深譬諸江河所及隨淺從流自

得不礙踈數其外或圖寫龍神鬼物之狀以

為嚴飾或造菩薩天仙之類周匝其旁白壁

成容玉眸高視黃英作相金口如言設無體

之禮實不佞於屈伸獻無聲之樂終不煩於

音律五色闕七亂其目八風無以吹其心守

靜樸以自持執堅中而不磷或虔恭默如或

侍坐儼如又於堂北別立鏡燈未燄揚輝紅

光滿室常生縱巧有符丁緩之奇蘭膏自芳

不假海人之贈幸斯破暗永繼其明於是群  
藝畢象工歸八龍關一軒四王護闥兩霑香  
砌何塵垢之蒙潤風搖寶鐸流美響之不已  
公頓首奏曰臣聞法象莫大乎天地變通莫  
大乎四時所以萬物生中不擇於覆載榮枯  
美惡必備於寒暑雖古先哲王弘天若德豈  
同聖代則而行之伏惟長慶文武孝德皇帝  
陛下英冠四維氣含八極齊日月之至耀光  
燭無窮等天地之至仁寰瀛授賜坐超湯禹  
立並義軒駟嶽瀆之精靈馳道德之車馬有

典有則無怠無荒法上玄以生成體陰陽以  
御物動合靈契事膺神符永綏兆人克顯休  
命臣猥承委擢如荷丘山簫艾空竊於春陽  
螻蟻每慙於雲雨修特關二允奉穹蒼上黷  
冕旒伏增驚越臣亦知螢光助於兩曜眈澮  
宗于四溟實不足以添輝亦不足以濟廣然  
纖美見容知大明之及遠洎流必納識渤澥  
之弘深臣早悟多藏勇於施捨聞斯必舉所  
作成集誓嚴持關一齋上續於恩光啓尊法  
涯永資於德澤帝曰俞卿以檀波羅福保于

朕躬朕以官惟其人任卿勿貳實千載之一  
會何魚水之見稱想卿逢時弘道多慶公荷  
寵之極涕零如雨又奏曰如來奧旨必藉開  
張若不言宣何以廣福臣請得無染沙門貞  
實等二七人御斯信馬駕彼白牛直出四關  
掃諸五翳偕持正念調伏其心為國傳經乃  
至無筭陛下得佛祕印行寰上乘於多劫中  
為人父母遂令釋子遵有漏法傳無盡燈滋  
寶雨而潤及四海關一香雲而蔭乎千界關一  
字天之下孰不蒙益受益之利上集一人伏

願寶曆天齊金轉嶽固永居億兆之上克承  
無疆之休帝悅依奏公曰克樹有為期於不  
朽略須題述以告將來遂命戎副右監門衛  
將軍楊承和文而書之辭曰小子蓬茨劣人  
跡度卑淺無當時應用之効有僻陋至愚之  
累靈波曲閨幸得克之幾歷星歲謬廁下風  
聞可道之言觀可行之行書紳不暇何以褒  
稱至如走光塵俟嘉命愚人不敢拒若使陳  
茸關一具德美愚人不敢當公不聽又辭曰  
抑短羽齊九臯之響殊不驚人使弊足追萬



里之跡豈宜及遠雖冲霄有路且力小未任  
况逐日無功而敢煩羈勒公又不聽是以磨  
鉢赴罽罽之割策鈍當天衢之駟流汗如沃  
愧顏若丹輒盡野辭書於闕一琰銘曰  
香山之東雪山之北善勝道場迦維之國飯  
王聖子有大威德菩薩伏膺龍天仰則惚彼  
十名高談四諦能於一毛普現一切阿僧祇  
劫瞬目所睇微塵刹土凝心所計無說非默  
有說非語汲引未終豈厭寒暑八正齊列三  
乘並舉惆悵逝多歲不我與舉足下足群魔

愁謗歸歟歸歟彼迷忘優曇忽折摩尼驟喪  
海會無言靈山多曠猗歟大雄情靈藩翰上  
下四維吾道一貫藏諸不理顯諸不亂託跡  
光周遺宗炳漢操之即存捨之即亡如來寶  
印付囑我唐心正墜典克續頽綱法雨一潤  
佛日重光真諦所歸域中之大無為所及宇  
宙之外幽宗默識玄機暗會千劫飛輪萬方  
永賴既崇其化邠國欽承久積吉行發言相  
膺意馬早繫心猿不升出彼夢宅如上崗陵  
不捨有相無相所依不離有作無作所歸焚

舟得濟到岸應稀達人是是塵人非非雲赴  
壽山澤歸福海層峰永固波瀾不改衆善斯  
立舒光耀彩樹彼勝因凜茲爽塏順生攝生  
從俗出俗因機立化賢愚共欲精廬大敬材  
力豐足購地關一字一金開堦累玉大匠誨人必  
先規矩大關一字垂美亦先棟宇墨請操繩般  
求執斧樸斲未已師者如堵千仞之桂良工  
所度十圍之松備于制作鈿饒土木海物交  
錯藻井舒蓮含芳吐萼裝嚴寶藏水陸窮珍  
瓌姿競麗華璫爭新馳光耀谷浮彩榮瀆既

美且良悉得其真實樹成行寶堦上聳善安  
不拔善高不恐欄楯曲周簷楹接擁蓋若天  
垂花如地涌實以方外四門不局虛以圓內  
萬法有經金石絲竹風來可聽玉釜旃檀日  
照彌馨鏡開八面燈傳一光夜關一字素魄晝  
助紅芒齊明隱顯等鑿行藏膏平潤久心直  
燃長忍鎧常穿四魔不脅智劒常拔三灾不  
怯何以奉佛利耶散業何以奉國演日成劫

長慶二年十二月一日立

右唐邠國公功德銘右神策軍護軍中

尉楊承和誤并書邠國公者內侍梁  
守謙也攷之唐史宦者守謙無傳惟憲  
宗十五年書帝暴崩於太極殿中尉梁  
守謙王守澄等共立太子殺吐突承瓘  
及澧王暉而韓文公平往西碑亦載守  
謙在帝左右嘗命之往撫蔡師失守謙  
以一宦者而爵至上公此可見憲宗之  
信任小人宜其晚節不終卒死宦者之  
手然則予之錄此蓋將為天下後世之  
戒而非徒取其文字也

終

金薤琳琅卷第二十

太僕少卿吳郡都

穆

唐顏魯公小字麻姑壇記

唐顏少保碑

唐撫州南城縣麻姑山仙壇記

麻姑者葛稚川神仙傳云王遠字方平欲東  
之括蒼山過吳蔡經家教其尸解如蛇蟬也  
經去十餘年忽還語家言七月七日王君當  
來過到期日方平乘羽車駕五龍各異色旌  
旗導從威儀赫奕如大將也既至坐須臾引

見經父兄因遣人與麻姑相聞亦莫知麻姑  
是何神也言王方平敬報久不行民間今來  
在此想麻姑能甞來有頃信還但聞其語不  
見所使人曰麻姑再拜不見忽已五百餘年  
尊卑有序脩敬無階思念久煩信承在彼登  
山顛倒而先被記當按行蓬萊今便甞住如  
是便還還即親觀願不即去如此兩時間麻  
姑來來時不先聞人馬聲既至從官當半於  
方平也麻姑至蔡經亦舉家見之是好女子  
年十八九許頂中作髻餘髮垂之至腰其衣

有文章而非錦綺光彩耀日不可名字皆世  
所無有也得見方平方平為起立坐定各進  
行厨金盤玉杯無限美膳多是諸華而香氣  
達於內外擗麟脯行之麻姑自言接待以來  
見東海土為桑田向聞蓬萊水乃淺於往者  
會時略半也豈將復還為陸陵乎方平笑曰  
聖人皆言海中行復揚塵也麻姑欲見蔡經  
母及婦經弟婦新產數十日麻姑望見之已  
知曰噫且止勿前即求少許米便以擲之墮  
地即成丹砂方平笑曰姑故年少吾不喜

復作此曹狡獪變化也麻姑手似鳥爪蔡經  
心中念言背痒時得此爪以把背乃佳也方  
平已知經心中所言即使人牽經鞭之曰麻  
姑者神人汝何忽謂其爪可以把背邪見鞭  
着經背亦不見有人持鞭者方平告經曰吾  
鞭不可妄得也大曆三年真卿刺撫州按圖  
經南城縣有麻姑山頂有古壇相傳云麻姑  
於此得道壇東南有池中有紅蓮近忽變碧  
今又白矣池北一壇傍有杉松皆偃蓋時  
聞步虛鍾磬之音東南有瀑布漂下三百餘

尺東北有石崇觀高石中猶有螺蚌殼或以  
為桑田所變西北有麻源謝靈運詩題入華  
子崗是麻源第三谷恐其處也源口有神祈  
兩輒應開元中道士鄧紫陽於此習道蒙召  
入大同殿修功德二十七年忽見虎駕龍車  
二人執節於庭中顧謂其友竹務猷曰此迎  
我也可為吾奏願欲歸葬本山仍請立廟於  
壇側玄宗從之天寶五載投龍於瀑布石池  
中有黃龍見玄宗感焉乃命增修仙宇真儀  
侍從雲鶴之類於戲自麻姑發迹於茲嶺南

真遺壇於龜原花姑表異於井山今女道士  
黎瓊仙年八十而容色益少曾妙行夢瓊仙  
而食花絕粒紫陽姪男曰德成繼修香水弟  
子譚仙巖法籙尊嚴而史玄洞左通玄鄒鬱  
華皆清虛服道非天地氣殊異江山炳靈則  
曷由纂懿流光若斯之盛者矣真卿幸承餘  
烈敢刻金石而志之時則六年夏四月也

右唐小字麻姑壇記顏真卿撰并書在  
今江西南城縣之麻姑山歐陽公謂或  
者疑其非真而復以為筆畫有法非魯

公不能書也趙明誠謂陳無已嘗見黃  
魯直言此乃慶曆中一學佛者所書魯  
直能道其名及觀陸放翁云魯公麻姑  
壇記有大小二本盖用羊叔子峴山故  
事通志金石略載魯公書亦有小字麻  
姑壇記則歐陽公之疑與魯直之言又  
似不足信元柳待制道傳云麻姑壇碑  
小字楷法尤精繁比聞舊石焚毀山中  
雖重刻無復當時筆意則亦以小字為  
顏書但謂石已不存非也吳文正公云

麻姑碑在吾鄉舊為雷所破重刻至再  
字體浸失其真則被焚者乃臨川大字  
本而南城之石至今固無恙也

唐故通議大夫行薛王友柱國贈祕

書少監國子祭酒太子少保顏君廟

碑銘并序

第七子光祿大夫行吏部尚書充

禮儀使上柱國魯郡開國公真卿

撰并書

集賢學士李陽冰篆額

昔孔悝有夷鼎之銘陸機有祠堂之頌皆所  
以發揮祖德敷演家聲故君子之觀其銘也  
既美其所稱又美其所為無而稱之是誣也  
有而不述豈仁乎論而譏之敢不祇懼君諱  
惟貞字叔堅其先出于顓頊之孫祝融融孫  
安為曹姓其裔邾邾武公名夷甫字顏子友  
別封邾為小邾子遂以顏為氏多仕魯為卿  
大夫孔門達者七十二人顏氏有八戰國有  
率躅秦有芝貞漢有異肆安樂其後喪亂譜  
謀淪亡魏有裴盛盛字叔臺青徐二州刺史

閔內侯始自魯居于琅邪臨沂孝悌里生廣陵太守給事中葛繹貞子諱欽字公若精韓詩禮易尚書學者宗之生汝陰太守護軍襲葛繹子諱默字靜伯生晉侍中右光祿大夫西平靖侯諱含字弘都隨元帝過江已下七葉葬在上元幕府山西生侍中光祿勳西平定侯諱髦字君道事具孝行傳生州西曹騎都尉西平侯諱緄字文和生宣城太守御史中丞諱靖之字茂宗生巴陵太守度支校尉諱騰之字弘道善草隸書有風格梁武帝草

書評云顏騰之賀道力並便尺牘少行於代生輔國江夏王叅軍諱炳之字叔豹以能書稱生齊待書御史兼中丞諱見遠字見遠和帝被弑一慟而絕梁武深恨之事見梁周北齊書生梁鎮西記室叅軍諱協字子和感家門事義不求聞達元帝著懷舊持以傷之撰晉仙傳五篇日月災異圖兩卷文集廿卷見梁書生北齊給事黃門侍郎待詔文林館平原太守隋東宮學士諱之惟字介著家訓廿篇冤魂志三卷證俗音字五卷文集卅卷事



具本傳黃門兄之儀周御正御史中大夫麟  
趾學士隋文輔政不署矯詔索璽又拒之出  
為集州刺史新野公後朝朔望引至御榻曰  
見危授命臨大節而不可奪古人所重何以  
加卿事具周書弟之善隋葉令子孫見于後  
黃門生皇秦王記室諱思魯愍楚遊秦小記  
室字孔歸君之曾祖也隋司經校書東宮學  
士率子弟奉迎義旗於長春宮招瓜州拜儀  
同博學善屬文自為父集序國史稱溫大雅  
在隋與思魯同事東宮彥博與愍楚同直內

史省彥博將與遊秦同典校秘閣二家兄弟  
各為一時人物之選少時學業顏氏為優其  
後職位溫氏為盛溫氏譜亦載焉生勤禮字  
敬君之祖也幼而朗悟識量弘遠工於篆籀  
尤精詰訓解褐校書郎與兩兄弟師古相時  
同時為弘文崇賢學士弟育德又於司經校  
定經史當代榮之太宗嘗令師古讚崇賢學  
士以兄弟特命蕭鈞讚之曰依仁服義懷文  
守一履道自居下帷終日德彰素里行成蘭  
室鶴鑰馳譽龍樓委質著作即修國史夔府

長史贈虢州刺史生昭甫敬仲殆庶無恤少  
連務滋辟強昭甫字周卿君之父也幼而穎  
悟尤明詰訓工篆籀草隸書與內弟殷仲容  
齊名而勁利過之特為伯父師古所賞重每  
有註述必令參定嘗得古鼎廿餘字舉朝莫  
識盡令讀之高宗侍讀曹王屬贈華州刺史  
真卿表謝肅宗批荅卿之乃祖當為碩儒既  
高倚相之能遂有臧孫之後不墜其業在卿  
之門生我伯父諱元孫衆君伯父聰穎絕倫  
尤工文翰舉進士考功郎劉竒特標榜之由

是名動海內累遷太子舍人玄宗監國專堂  
令晝嘗和遊苑詩批云孔門稱哲宋室聞賢  
翰墨玄捷莫之與先歷滁沂濠三州刺史贈  
秘書監君仁孝友悌少孤育舅殷仲容氏蒙  
教筆法家貧無紙筆與兄以黃土掃壁木石  
畫而習之故特以草隸擅名天授元年糊名  
考校判入高等以親累授衢州叅軍與盈川  
令楊炯信安尉栢彥範相得甚歡又選授洛  
州温縣永昌二尉每選皆判入高科侍即蘇  
味道以所試示介衆曰選人中乃有如此書

判嗟歎久之墜代兄為長安尉太子文學以  
清白五為察訪使魏奉古等所薦王郎初開  
盛選僚屬拜薛王友柱國伯姊御史大夫張  
知泰妻魯郡夫人亡將塋數家古君不宜臨  
壙君哭而拒之曰豈有忘手足之痛牽拘忌  
而忍自絕乎弗從其年秋七月才生明遘疾  
而歿教義者隱而傷馬與會稽賀知章陳郡  
殷踐猷吳郡陸象先上谷寇泚河南源光裕  
博陵崔瓌友善事具陸據所撰神道碑累贈  
秘書少監國子祭酒太子少保真卿表謝肅

宗批荅云卿之先人德行優著學精百氏藝  
絕六書頻擢甲科屢升循政曳裾王府名有  
鄒枚載筆春宮道高徐沈既而壽乖華髮器  
紆青雲業載史臣慶傳令子追存盛美褒贈  
崇班且旌善於義方俾揚名於有後濠州生  
春卿杲卿曜卿旭卿茂曾春卿工詞翰倜儻  
有吏材蘇頲舉茂才偃師丞杲卿文理清峻  
所居有聲太常居攝常山太守祿山反擒其  
心手開土門拜衛尉卿兼中丞城陷杲卿叱  
詈之遂被鈎舌支解而終贈太子太保謚曰

忠節真卿表謝肅宗批荅云自羯胡猖狂入我河縣所在官吏多受迫脅卿兄以人臣大節獨制橫流或俘其謀主或斬其元惡當以殺兵懸絕身陷賊庭旁若無人歷數其罪手足寄於鋒刃忠義形於顏色古所未有朕甚嘉之矐卿工詩善草隸十五以文學直崇文館淄州司馬旭卿善草書胤山令茂曾好屬文詰訓仁厚絕衆捷為司馬君生闕疑允南喬卿真長幼輿真卿允藏闕疑仁孝有吏能精詩傳善剖判杭州參軍允南仁孝有清識

工詩人多誦其佳句善草隸與春卿杲卿矐卿同日於銓庭為侍郎席建侯所賞達奚珣薦為左補闕真卿時為殿中正至三拱法座蹈舞而衣袂相接者三故允南賦詩云誰言百人會兄弟也霑陪歷殿中膳部司封郎中司業金鄉男喬卿仁和有吏幹富平尉真長清直早世幼輿方雅有醞藉通班漢左清道兵曹真卿早孤蒙伯父允南親自教誨舉進士歷校書制舉醴泉尉陟清白長安尉三院御史四為大夫六為尚書再為採訪節度充

禮儀使光祿大夫魯郡公允藏敦質孝悌有  
吏能制舉延昌令監察充朔方衣資使殿中  
三為侍御史中允江陵少尹荆南行軍濠州  
及君孫泉明佐父開土門彭州司馬威明邛  
州司馬季明子幹沛詡頗誕及外孫博野尉  
沈盈盧逖並為逆胡所害各蒙贈五品京官  
濬好屬文翹華正顓慈明都水使者頗好五  
言校書顓仁孝方正明經大理司直嶺南營  
田判官執喪九日不食頡河陽尉顓鳳翔參  
軍頗工小楷洗馬顏恭仁奉禮郎並早喪逝

絃方義主簿泉明靚並沒蠻襲明微明德明  
未仕通明獲嘉尉將明昌明尉克明崇文明  
經衛密標榜之翹有德行文詞華原主簿準  
溧水尉靚頗工文襄陽尉靚有文行弘文進  
士顓仁友清白常熟令封金鄉男頡清介勤  
學侍郎蔣洌賞其判京兆兵曹襲金鄉男岫  
仁純常熟主簿任城男頡浚儀尉頡清源尉  
頂幹辦揚府法曹願長厚清白朝邑尉頡左  
率倉曹碩祕書正字頡有吏幹歙州錄事參  
軍曲阜男頡好為詩富陽尉顓好為文常州

參軍並粗有所立君之諸祖諸父群從揚庭  
願並侍讀強學益期並學士中和至誠敬仲  
大智溫之激之澹之播挺援撰溫泳陵並明  
經康成強學希莊日損隱朝鄰幾知微舒說  
順勝式宣韶並進士制舉有意中和趨庭希  
莊至刺史利仁明天文欣期元淑景靈並校  
書光庭注後漢書嘉賓千里昇庠斥朝怡滔  
渾允濟摺逸覲不器防有文詞博古少連恭  
敏惇學行敬仲溫之以孝聞潤有風義冕鱗  
邈迢以清白稱其餘咸著官族不獲悉數洪


惟累祖之耿光丕業有若子泉弘都之德行  
巴陵記望之書翰特進黃門之文章祕監華  
州之學識肇自魯國格于聖代紛綸盛美遂  
舉集于君君能述遵前人不敢失墜其事以  
忝聿修宜其克饗尊榮為清廟不祧之主真  
卿幸承遺訓叨受國恩既荷無疆之休敢揚  
不朽之烈銘曰


系我宗邦顏公子封鄆魯附庸亞孔聖洛沂  
風刺青徐給事中護營柳渡江楓侍兄疾感  
地童鄰火斷珥貂重施七葉傳孝恭武騎都

尉司從便尺牘繼魚蟲慟君難憤而終咨施  
室游湘東嗟禦正凜移忠衆黃門擅文雄三  
韶長事東宮四穆叔史牢寵褒華州詰訓通  
小秘監盛名鴻維少保文翰工莅畿赤五褒  
崇登望苑友桂叢三超贈保儲躬流光盛廟  
貌融永不祧垂無窮

建中元年歲次庚申秋七月癸亥朔鐫  
畢八月己未真卿蒙恩遷太子少師冬  
十月壬子男頽封沂水縣男碩新泰縣  
男姪男頂三縣男頌費縣男頌鄒縣男

微軀官階勲爵並至二品子姪八人受  
封無功無能叨竊至此子孫敬之哉





金璫琳琅卷第二十終



金璫琳琅卷第二十



